

PEMBERITAHUAN PERTANYAAN
DEWAN RAKYAT, MALAYSIA

PERTANYAAN : LISAN

**DARIPADA : YB PUAN SITI ZAILAH BINTI MOHD
YUSOFF**

KAWASAN : RANTAU PANJANG

TARIKH : 20 MEI 2015 (RABU)

NO. SOALAN : 35

YB PUAN SITI ZAILAH BINTI MOHD YUSOFF [RANTAU PANJANG] minta MENTERI PERDAGANGAN ANTARABANGSA DAN INDUSTRI menyatakan program pemulihan usahawan kecil dan sederhana berjaya dipulihkan yang terjejas akibat banjir di seluruh Kelantan.

JAWAPAN

Tuan Yang Di Pertua,

Kerajaan sentiasa prihatin terhadap nasib mangsa-mangsa bencana, termasuk PKS yang terjejas perniagaan mereka akibat banjir yang telah berlaku pada penghujung tahun lalu. Kerajaan melalui Kementerian Perdagangan Antarabangsa dan Industri (MITI) telah

mengambil inisiatif menyediakan Dana Kecemasan PKS (SMEEF) sebanyak RM10 juta dalam bentuk geran dan pinjaman mudah yang disalurkan melalui SME Corp. Malaysia dan Malaysian Industrial Development Finance Berhad (MIDF). Program ini merupakan salah satu program pemulihan kepada usahawan yang terjejas akibat banjir. Skop pembiayaan dana adalah meliputi pembelian mesin dan peralatan bagi menggantikan mesin yang musnah, pembelian bahan mentah dan membaik pulih premis perniagaan.

Sehingga 30 April 2015, SME Corp. Malaysia telah menerima 659 permohonan mendapatkan geran daripada PKS yang terjejas di Kelantan, Terengganu, Pahang dan Perak. Daripada jumlah tersebut, sebanyak 198 permohonan telahpun diluluskan dengan jumlah pembiayaan RM1.85 juta. Sebanyak 612 atau 93% daripada permohonan dana ini diterima daripada PKS Kelantan. Dalam tempoh yang sama, sebanyak 120 PKS telah memohon Dana Kecemasan PKS dalam bentuk pinjaman mudah yang diuruskan oleh MIDF. Daripada jumlah tersebut, sebanyak 79 permohonan telahpun diluluskan dengan jumlah pembiayaan RM6.19 juta.

Tuan Yang Di Pertua,

Selain itu, MITI melalui SME Bank turut menyediakan bantuan kewangan untuk membantu PKS yang terjejas. Bantuan tersebut adalah melalui dana Kemudahan Bantuan Khas (Special Relief Fund) dalam bentuk Skim Jaminan Kredit. Sehingga 30 April 2015,

sebanyak RM2.2 juta telah diluluskan kepada 32 usahawan di Kelantan.

Tuan Yang Di-Pertua,

Antara program-program *outreach*, dengan izin yang dilakukan oleh MITI dan Agensi bagi memastikan usahawan yang terjejas akibat banjir mendapat bantuan daripada dana-dana yang disediakan adalah:

- i. menganjurkan sesi taklimat mengenai proses permohonan bagi mendapatkan bantuan kewangan di bawah Dana Kecemasan PKS (SMEEF) kepada PKS yang terjejas;
- ii. melawat kawasan yang dikenal pasti terjejas akibat banjir dan menawarkan bantuan kewangan di bawah SMEEF. Usaha ini telah dijalankan dengan kerjasama persatuan perdagangan dan juga pegawai-pegawai daerah di kawasan-kawasan yang terlibat;
- iii. membuat hebahan media mengenai dana ini bagi memastikan liputan yang lebih meluas disampaikan kepada PKS yang terlibat;
- iv. menyusun semula pembiayaan sebanyak RM11.8 juta yang melibatkan 13 syarikat di bawah skim-skim pinjaman MIDF

untuk memberi peluang kepada syarikat-syarikat tersebut untuk kembali memulakan perniagaan; dan

- v. melakukan tinjauan di kalangan pelanggan SME Bank di kawasan yang terjejas akibat banjir dan menawarkan penangguhan bayaran ansuran bulanan sehingga 6 bulan kepada mangsa banjir.